

KALATAS

OPISYAL NA PAHAYAGAN NG REBOLUSYUNARYONG MAMAMAYAN
NG TIMOG KATAGALUGAN

TOMO 29 BLG. 1

Basahin at Talakayin

ENERO - MARSO 2001

SA NEGOSASYONG PANGKAPAYAPAAAN

NDFP Haharap pa rin

Sa kabila ng katrayduran ng
Rehimeng US Macapagal-
Arroyo sa nabigong
pagliligtas kay Martin

EDITORIAL



Katrayduran ang nabigong pagliligtas ng mga militar sa bihag-ng-digma ng BHB na si PCI Abelardo Martin na naging sanhi ng kanyang pagkasawi. Sinadyang labagin ng militar ang mga nagawang negosasyon hinggil sa pagpapalaya ng mga bihag-ng-digma. Winalang-bahala ang kapakanan at kaligtasan ng nabihag nilang kasamahan maisakatuparan lamang ang imbing pakanang isabotahe ang ligtas at maayos na pagpapalaya sa mga bihag-ng-digma, agawin ang inisyatiba at sagkaan ang

pagsulong ng usapang pangkapayapaan sa pagitan ng GRP at NDFP.

Sa napakaagang panahon pa ng pag-upo ni Gloria M. Arroyo sa kapangyarihan, may mga pwersang nais nang sirain ang mga hakbanging isinasagawa para sa pagtataguyod ng pagkakaunawaan sa pagitan ng GRP at NDFP bilang paghahanda sa muling pag-usad ng
Sundan sa kasunod na pahina ►

NILALAMAN

- 1** Editorial: Sa Usapang Pangkapayapaan: NDFP Haharap Pa Rin
- 3** May Bagong Maskara ang Halimaw
- 7** Bilang Pagpapakita ng Kabutihang-Loob: BHB, Palalayain si Army Major Noel Buan
- 9** Pagbagsak ng Rehimeng US-Estrada: Isang Maningning na Tagumpay ng Kilusang-masa
- 10** Si Ka Bart Tungkol sa PTC at Eleksyon
- 13** Alab, Muling Binuhay
- 13** Sa Halos Dalawang Taon ng Pagkabihag: Itinataguyod ng BHB ang Karapatan ni Buan Bilang Bihag-ng-Digma
- 14** Bayan ng Burdeos, Muling Ni-Reyd
- 15** Balita
- 16** Tek-teka

Ang KALATAS ang opisyal na pahayagan ng rebolusyunaryong mamamayan ng Timog Katagalugan. Pinapatnubayan ito ng Marxismo-Leninismo-Maoismo. Inilalathala ito ng Partido Komunista ng Pilipinas (MLM) at ng Bagong Hukbong Bayan ng Timog Katagalugan.

Inaanyayahan ng Pamatnugutan ang mga mambabasa na mag-ambag sa pagpapahusay ng ating pahayagan. Magpadala ng mga komentaryo at mungkahi, balita at rebolusyunaryong karanasan na maaaring ilathala sa ating pahayagan.

Maaaring makuha ang pinakahuling isyu ng ating pahayagan sa internet. Magtungo sa

http://members.nbci.com/kalatas_ST/index.htm

Tumatanggap din ng mga liham sa

kalatas_st@yahoo.com

◀Mula sa nakaraang pabina

nabinbing usapang pangkapayapaan.

Sari-saring paglulubid ng kasinungalingan ang ginagawa ng AFP upang pagtakpan ang tunay na pangyayari at palabasin na ang naganap ay isang di-inaasahang engkwentro sa pagitan ng BHB at militar. Subalit anuman ang gawin nilang pagtatakip lalo lamang sumisingaw ang baho ng maitim na balakin sa likod ng nabigong pagliligtas kay Martin ng militaristang pangkat na nakapaligid ngayon kay Arroyo.

Nababalisa ang militaristang pangkat na ito, na karamihan ay nasa mataas na kumand ng AFP at PNP, sa muling pag-usad ng usapang pangkapayapaan. Ginagawa nila ang lahat ng paraan upang sagkaan ang negosasyon at ipagkait sa nakikibakang mamamayan ang pagkakamit ng mga makabuluhang pagbabago sa lipunan na ibubunga ng usapang pangkapayapaan.

Hindi natin aasahan ang rehimeng Arroyo na gumawa ng mga hakbangin upang pigilin ang kontra-rebolusyong balakin ng militaristang pangkat na ito. Paano natin aasahan ang isang rehimeng pangunahin ngayong nakasalig sa bloke ng militar na nagmamaniobra upang render ang rehimeng US-Arroyo? Ipinaubaya mismo ni Arroyo sa bloke ng militar ang inisyatiba tungkol sa mga usapin ng seguridad. Malaya nitong nagagawa ang gusto nilang mangyari nang walang anumang pagtutol mula sa rehimeng US-Arroyo.

Hawak ng pangkat na ito ang leeg ni Arroyo at nagagawa nitong igiit maging ang nagsasariling galaw nito. Sa kasalukuyan, pinaliligiran si Arroyo ng mga opisyal militar na tagasunod nina Ramos at de Villa. Bilang “pagtanaw ng utang na loob” inilalagay ni Arroyo ang mga ito sa mga estratehikong pwesto sa gobyerno at sinusunod anuman ang idikta sa kanya ng pangkating ito.

Pinaigting ng militaristang pangkat na ito ang mga opensibang militar at inilalagay sa alanganing posisyon si Arroyo upang maigiit ang kanilang mga kontra-rebolusyunaryong adyenda at harangin ang pagpasok sa gobyerno ng mga demokratikong pwersa. Ginagawa nila ang lahat ng paraan upang pangalagaan ang malakolonyal at malapyudal na sistema ng lipunan.

Kahit sa panahong nagkokonsolida pa lamang ng kapangyarihan si Arroyo at kinakailangang gumawa ng mga pabalat-bungang hakbangin ay hinahadlangan na

Sundan sa kasunod na pabina ▶

May Bagong Maskara ang **HALIMAW**



PANGUNAHING LATHALAIN




Nagbago na ang pamahalaan. Pinalitan na ng bagong rehimeng US-Macapagal-Arroyo ang kinasusuklamang rehimeng US-Estrada. Nailuklok ang gobyernong Macapagal-Arroyo sa kapangyarihan sa daluyong ng ikalawang *people power*.

Muling ginamit ng sambayanan ang likas na angking lakas nito sa pagpapataksik ng isa na namang bangkaroteng rehimen.

◀ *Mula sa nakaraang pabina*

siya ng militaristang pangkating ito. Sa munting pagpapakita ng pagpapahalaga sa mga progresibo at demokratikong pwersa, kaagad siyang inaakusahang maka-Kaliwa at kaagad iniaamba ang planong kudeta upang patalsikin siya sa pwesto.

Sa kabila at sa harap ng ganitong balakid, nananatiling matatag ang determinasyon ng rebolusyunaryong kilusan na isulong ang usapang pangkapayaan sa reaksyunaryong gobyerno. Anumang pagtatangka ang gawin ng blokeng militar na kumukontrol sa rehimeng Arroyo, mananatili ang pagsisikhay ng rebolusyunaryong kilusan na bigyang kalutasan ang



Marami sa mamamayan ang lipos ng bagong pag-asa para sa pagbabago at kaunlaran. Panay ang pangako ng bagong rehimen ng pagbabago at kaunlaran.

Subalit sa kabila ng pagbabago ng gobyerno, hindi pa rin tumitigil ang rumaragasang karahasang militar sa kanayunan.

Patuloy ang Karahasang Militar

Ang pagkamatay ng bihag-ng-digmang si Police Chief Inspector Abelardo Martin sa kamay ng militar

Sundan sa kasunod na pabina ▶

pangunahing dahilan ng digmaan at makamit ang tunay at pagmatagalang kapayapaan na minimithi ng sambayanan.

Magiging sukatan ito ng kahandaan ng rehimeng Arroyo na muling isulong ang usapang pangkapayapaan. Makikita ng mamamayan kung sino ang tapat at tunay na naghahangad ng kapayapaan at pagbabago sa lipunan.

Hindi maapektuhan ng pagkasawi ni PCI Martin ang muling pag-usad ng usapang pangkapayapaan. Magsisilbing hamon ito upang matatag nating isulong ang negosasyon sa harap ng pagtatangka ng mga reaksyunaryong pwersa na pigilin ito.

K

“Ang... people power 2 ay muling inagaw ng isang paksyon ng naghaharing uri upang bigyan ng bagong maskara ng halimaw ang malakolonyalismo at malapyudalismo.”

◀ *Mula sa nakaraang pahina*

bunga ng bigong pagtatangka ng mersenaryong militar karahasang militar sa Timog Katagalugan.

Ambisyon ng tinangka pa ng pasistang militar na iligtas si PCI Martin sa kabila ng katotohanang pinag-uusapan na ng Gobyerno ng Republika ng Pilipinas (GRP) at ng National Democratic Front of the Philippines (NDFP) ang paraan ng pagpapalaya sa dalawang bihag-ng-digmang hawak ng Melito Glor Command (MGC-BHB). Kung tutuusi’y malisyosong nagsariling kilos ang institusyong militar nang lihis sa iginagalaw ng sibilyang burukrasya.

Isang malaking kasinungalingan ang sinabi ng kaaway na *chance encounter* o tsansang labanan lamang ang nangyari. Ipinahayag ni Tirso “Ka Bart” Alcantara, tagapagsalita ng Melito Glor Command at NDFP-Timog Katagalugan, na bago pa man ang reyd ng BHB sa Burdeos, Quezon, nagtutulung-tulong na ang mga pwersa ng 3rd SRC, 1st IB at 4th ISU (Intelligence Security Unit) sa paghahanap sa kinaroroonan ni PCI Martin at sa kanyang *NPA custodial force*. Tukoy ang lugar na inatake ng 30 elemento ng Scout Rangers noong Marso 8. At noong madaling-araw na ay ipinahahayag ng SOLCOM sa midya na “na-*rescue* na si Martin”. (Para sa detalye, basahin ang ispesyal na isyu ng Kalatas, Abril 6, 2001.

Ang nangyari kay PCI Martin ang lantad na pagpapakita ng militarisasyon sa Timog Katagalugan. Subalit higit na marami ang hindi nabubunyag na karahasang militar at lansakang pagtampalasan ng pasistang kaaway sa mga karapatang pantao ng mga

sibilyan, Pulang Mandirigma *hors d’ combat* (wala nang kakayanang lumaban) at maging sa mga dating Pulang mandirigma.

Sa kabila ng pagpapalit ng gobyerno at panawagan ng rehimeng US-Macapagal-Arroyo para sa kapayapaan at rekonsilyasyon, hindi inihinto ng AFP ang pagpapatupad ng mapaminsalang Oplan Makabayan at Coplan Balangai ng pinatalsik na gobyernong Estrada.

Nananatiling pinakamilitarisadong rehiyon ang Timog Katagalugan labas sa isla ng Mindanao. Nananatiling nakapakat dito ang anim na panlabang batalyon ng AFP, dalawang panlabang batalyon ng PNP-RSAF, mga RMGs at PMGs, at mga yunit sa paniktik.

Patuloy ang marahas na pagsuyod ng mga tropang militar sa mga sona’t larangang gerilya ng rebolusyunaryong kilusan. Ilang beses nang inatake ng mga pwersa ng militar ang ilang yunit ng BHB mula noong maluklok ang gubyernong Macapagal-Arroyo hanggang sa katapusan ng Marso. May ilang napaulat na ring insidente ng paglabag ng kaaway sa karapatang pantao ng mga sibilyan.

Tampok sa mga ito ang naganap na depensibang labanan sa Siniloan, Laguna isang linggo matapos magtagumpay ang EDSA 2, kung saan kinubkob ng mga elemento ng 1st IB ang isang yunit ng BHB. Limang Pulang Mandirigma at isang matandang babaeng sibilyan ang napatay. Ang isang sugatang nahuli ng kaaway ay patuloy nilang itinatago, na direktang paglabag sa kanyang mga karapatan.

Sinundan ito ng isa pang depensibang labanan sa Sta. Maria, Laguna noong Pebrero 16, kung saan sinasabing apat na kaaway ang napatay ng napalabang sandatahang yunit pampropaganda (SYP).

Hindi pa nadala sa nangyari kay PCI Martin, makailang ulit pang nilabag ng bayarang AFP ang idineklarang tigil-putukan ng gubyernong Macapagal-Arroyo sa Timog Katagalugan bilang pagbibigay-daan sa pagpapalaya sa bihag-ng-digmang si Army Major Noel Buan. Sabi nga ni Ka Bart, “walang pagtigil ang mga operasyong militar ng AFP at PNP sa iba’t ibang bahagi ng Timog Katagalugan.”

Batay pa rin sa pahayag ni Ka Bart, hindi pa tumigil ang mga operasyong militar sa mga lalawigan ng Quezon, Cavite, Batangas. Tuluy ang palipat-lipat na checkpoint ng PNP-SAF sa Oriental Mindoro. May naitalang mga

Sundan sa kasunod na pahina ▶

◀Mula sa nakaraang pabina

kaso ng pananakot at panggaganggang, pambubugbog at ilegal na paghuli't pagkulong sa mga pinaghihinalaang tagasuporta ng BHB sa Quezon. Nagpatuloy ang mga operasyong paniktik, at hindi pinabalik ang kanilang mga kawal sa baraks.

Bakit ganito ang nangyayari? Bakit hindi tumigil ang militarisasyon kahit nagbago na ang pamahalaan?

Walang Nabago

Ipinakikita nito na walang saligang pagbabagong naganap sa lipunang Pilipino. Sapagkat kahit bago na ang nakaupong gubyerno, pareho pa rin ng nakaraang mga rehimen ang pagtingin nito sa rebolusyunaryong kilusan at nakikibakang mamamayan: seryosong banta sa kanyang makauring paghahari at "malayang" pandarambong sa kabang-yaman ng mamamayan at bansa.

Nagpalit lamang ng maskara ang halimaw. Ang rehimen ng US-Macapagal-Arroyo na pumalit sa estado poder ng kapangyarihan ay kinatawan ng isa sa maraming paksyon sa loob ng mga naghaharing uring malaking burgesya-kumprador at panginoong maylupa sa lipunang Pilipino. Pinalitan lamang nito ang paksyong Estrada sa makauring paghahari sa lipunang Pilipino. Wala itong ipinagkaiba sa saligan sa pinatalsik na rehimen ng US-Estrada.

Ang malaganap na pagkilos ng mamamayan sa tinatawag na *people power 2* ng taong 2001, tulad ng naganap sa *people power 1* ng taong 1986, ay muling inagaw ng isang paksyon ng naghaharing uri upang bigyan ng bagong maskara ng halimaw ang malakolonyalismo at malapyudalismo. Ang gubyernong Macapagal-Arroyo, tulad ng nakaraang gubyernong Aquino, ay instrumento lamang ng mga lokal na naghaharing uri upang mailigtas nito ang sarili laban sa nag-aalsang mamamayan at rebolusyunaryong kilusan.


Katulad ng gubyernong Estrada, ang bagong gubyernong Macapagal-Arroyo ay kinatawan ng mga lokal na naghaharing uri sa lipunang Pilipino, at masugid na tagapagtanggol at tagapagtaguyod ng imperyalismo, pyudalismo at burukrata kapitalismo. Kayat katulad ng

nakaraang mga rehimen, gagamitin nito ang makauring batas at bayarang militar upang ipagtanggol ang makauring paghahari nito laban sa mga itinuturing nitong kalaban.

Ang militarisasyong nararanasan sa Timog Katagalugan at sa iba pang dako ng bansa, sa kasamaang-palad, ay isa lamang sa mga masaklap na dapat asahan sa bagong rehimen. Sapagkat,

tulad sa nakaraang mga rehimen, patuloy na mararanasan ng sambayanan sa bagong rehimen ang ibayo pang paglaganap ng pang-ekonomiyang kahirapan, pampulitikang kaapihan at bangkaroteng kultura.

Si Macapagal-Arroyo, noong senador pa lamang siya, ang nanguna sa senado sa pagpapaloob sa bansa sa imperyalistang globalisasyon na nagpasidhi sa imperyalistang pandarambong sa bansa. Siya ang nagpanukala ng mga batas na ngayo'y nagpapahirap sa mga magsasaka, manggagawa, petiburgis at maging sa mga maliliit na negosyante.



Mas Mahina Kaysa sa mga Sinundan

Subalit relatibong mas mahina na ang bagong luklok na rehimen kumpara sa sinundan nito. Mas mahina ang pundasyong pampulitika at pang-ekonomiya ng gobyernong Macapagal-Arroyo dahil sa panibagong paglalim ng pamalagiang krisis ng malakolonyalismo at malapyudalismo sa lipunang Pilipino. Pinasisidhi pa ito ng kawalan ng maaasahang tulong sa imperyalismo na binabayo rin ng krisis ng kapitalismo.

Dagdag pa rito ang tumitinding bangayan sa loob mismo ng mga naghaharing uri dahil sa papaunting madarambong sa kabang-yaman. Babago pa lamang sa puwesto ng kapangyarihan ang nakaupong rehimen ay nag-aaway-away na ang mga paksyon sa loob ng pangkating Macapagal-Arroyo. Pinag-agawan kaagad ng mga grupong Cory-Sin, Ramos-de Villa at mga sosyal-demokrata ang iba't ibang posisyon sa gubyerno.

Bukod sa bangayang ito na nagpapahina na sa koalisyon ni Macapagal-Arroyo, ang pagpupumilit ni

Sundan sa kasunod na pabina ▶

◀Mula sa nakaraang pabina

Macapagal-Arroyo na pagtagpuin ang mga nagbabanggaang interes ng mga grupong ito ay dagdag na magpapahina sa kanyang koalisyon.

Ang paksyong Estrada sa loob ng naghaharing uri, na nagmamaniobra pa rin upang makabalik sa kapangyarihan, ay nananatiling isang malaki at seryosong banta sa rehimeng US-Macapagal-Arroyo. Dagdag pa rito ang banta ng Young Officers' Union (YOU), isang dulong maka-Kanang paksyon sa loob ng institusyong militar, ng kudeta kapag nakipagmabutihan ang kasalukuyang rehimen sa rebolusyunaryong kilusan.

At higit sa lahat, kailangang paimbabaw na pagbigyan ng bagong rehimen ang mga kahilingan ng ngayo'y higit na mapagbantay na sambayanan. Dahil muling itinaas ng *people power* 2 ang kamalayang pampulitika ng mamamayan. Higit ngayon itong mapagbantay sa paggampan ng gubyrno sa kanyang tungkulin, at mas mataas ang inaasahan nito sa gubyrnong iniluklok hindi sa pamamagitan ng boto kundi sa pamamagitan ng *people power*.

Militarista

Sa pagsusumikap ng bagong rehimen na kagyat na makapagkonsolida laban sa banta ng paksyong Estrada at ng rebolusyunaryong kilusan, kagyat itong sumalig sa militaristang grupong Ramos-de Villa. Kayat sa pagsisimula pa lamang ng bagong rehimen, kitang-kita na ang pangingibabaw at pagsasarili ng paksyong militar sa gubyrnong Macapagal-Arroyo. Ang mga dating militar ang umuukupa sa mga mahahalaga at mas maraming posisyon sa loob ng gubyrno.

Mauunawaan ito sa puntong mahina ang pinagsimulang lakas ni Macapagal-Arroyo sa ekonomya't pulitika, kayat pwersado itong kumapit sa militar upang matiyak ang pananatili nito sa kapangyarihan sa harap ng mga banta sa kanyang pagkapangulo. Bukod pa sa maling paniniwala nitong ang institusyong

*"Ang... people power
2 ay muli't muling
magaganap... hanggat
ang napapalitan
lamang ay ang
maskara ng halimaw
na reaksyunaryong
estado at buo pa ang
mersenaryong militar
na mabangis na
nagtatangol dito."*

militar, at hindi ang nag-alsang mamamayan, ang nagtiyak sa pagkaluklok nito sa kapangyarihan.

Kaya naman kagyat na nagbigay ang gubyrnong Macapagal-Arroyo ng dagdag na sahod sa militar, subalit pinabayaan ang mga higit na nangangailangan at mas nakararaming empleyado ng gobyerno.

Kung kayat namamayagpag ang institusyong militar. Malakas-ang-loob na nagsasariling kilos ito kahit lihis sa atas ng gubyrno, at agresibo itong naglulunsad ng militarisasyon sa buong bansa. Ito rin ang magpapaliwanag ng lumilitaw na militaristang katangian ng rehimeng US-Macapagal-Arroyo.

Tunguhin

Sa buod, tinitiyak ng reaksyunaryong katangian ng bagong rehimen na walang maaasahang tunay na pag-unlad ang sambayanan. Manapa, ang pro-globalisasyong oryentasyon ni Macapagal-Arroyo ay magbubunga ng ibayong pagsidhi ng krisis ng malapyudalismo at neokolonyalismo.

Nangangahulugan ito para sa sambayanang Pilipino ng higit na malalim na pagkasadlak sa burak ng kahirapan, kawalan ng trabaho at lupa, kawalan ng karapatan, proteksyon at suporta sa hanapbuhay, at matinding kasalatan ng mga serbisyong panlipunan.

Dahil mas mahina ang bagong rehimen kaysa sa sinundang mga rehimen, nangangahulugan din na magpapatuloy at titindi pa ang militarisasyon at ang kaakibat nitong pagtampalasan sa karapatang pantao ng mamamayan upang makapanatili ang tambalang paghahari ng malalaking burges-kumprador-asendero sa lipunang Pilipino.

Makikita sa kalagayang ito na sa kamay pa rin ng sambayanang Pilipino nakasalalay ang kaganapan ng tunay na kalayaan at demokrasya, at kapayapaan at kaunlaran. At makakamit lamang ito sa pamamagitan


Sundan sa kasunod na pabina ▶

Bilang pagpapakita ng kabutihang-loob:

BHB *Palalayain* si Army Major Noel Buan

Halos dalawang taon sa pangangalaga ng Melito Glor Command, nakatakda nang palayain ng BHB ang bihag-ng-digma nito na si Army Major Noel Buan. Ang pagpapalaya ay gagawin bilang pagpapakita ng Pambansa Demokratikong Prente ng Pilipinas ng kabutihang-loob at katapatan sa mithiing isulong ang usapang pangkapayapaan sa pagitan nito at ng GRP na kasalukuyang kinakatawan ng rehimeng US-Arroyo.

Palalayain si Buan ayon sa sinserong inisyatiba ng rebolusyunaryong kilusan bilang pagtataguyod sa Pulang kapangyarihan ng demokratikong gobyernong bayan. Gagawin ang pagpapalaya nang walang anumang kondisyong itatakda sa reaksyunaryong gobyerno bilang kapalit.



Matagal nang pinatunayan ng rebolusyunaryong kilusan ang nakikidigmang estado nito sa pamamagitan ng kakayanan nitong hawakan ng matagal na panahon ang bihag-ng-digma nito at ligtas na pagpapalaya sa kanila.

Bagamat di lubos na umaasa sa katapatan ng rehimeng US-Arroyo, inaasahan ng PDPP na susuklian ng rehimen ang aktong ito ng PDPP sa pagtupad sa nauna nitong pangakong pagpapalaya sa mga bilanggong pulitikal. Subalit gaya ng nabanggit, hindi ito magsisilbing kondisyon sa nakatakdang pagpapalaya kay Buan. Tuparin man ni Arroyo ang kanyang pangako o hindi, matutuloy ang pagpapalaya kay Buan.

Sundan sa kasunod na pabina ►

◄Mula sa nakaraang pabina

ng patuloy na pagsusulong ng demokratikong rebolusyong bayan na may dalawang yugto hanggang sa tagumpay. Sapagkat sa pagtatayo lamang ng demokrasyang bayan at sosyalistang lipunan maisasakatuparan ang tunay na “bagong pulitika” at mapapawi ang pagsasamantala ng uri sa uri na siyang puno’t dulo ng kahirapan.

Ang naganap na *people power 2* ay muli’t muling magaganap sa hinaharap hanggat hindi tunay na nalulutas ang mga ugat ng kahirapan ng sambayanang Pilipino. Patuloy nila itong gagawin hangga’t ang napapalitan lamang ay ang maskara ng halimaw na reaksyunaryong estado at buo pa ang mersenaryong militar na mabangis na nagtatanggol dito.

Ang bawat magaganap pang *people power* ay magsisilbing praktisan ng rebolusyunaryong kilusang masa hanggang sa maipon ang sapat na armadong rebolusyunaryong lakas sa kanayunan para sa ganap na pagkubkob sa kalunsuran. Huling ilulunsad ang *people power* sa isang pangkalahatang insureksyon sa kalunsuran sa bisperas ng tagumpay ng pambansa-demokratikong rebolusyon. Kasabay nito, dudurugin na ng Bagong Hukbong Bayan ang natitirang lakas ng higit-nang-napahinang reaksyunaryong hukbo.

Sa panahong ito, ang iluluklok na sa kapangyarihan ay ang demokratikong gobyernong bayan. At sa kasunod na sosyalistang rebolusyon at konstruksyon, unti-unting malilikha mula sa abo ng digmaang sibil ang tunay na kalayaan at demokrasya, at kaunlaran at kapayapaan. **K**

◀Mula sa nakaraang pabina

Bago nabihag ng BHB, si Buan ay ang *chief intelligence officer* ng dating Southern Luzon Command ng AFP. Matapos ang kanyang pagkaaresto, inilagay siya sa ilalim ng pangangalaga ng Melito Glor Command at sa buong panahon na siya ay naging bihag-ng-digma, natamasa niya ang mahusay na pagtrato at itinaguyod ang kanyang karapatan alinsunod sa mga itinakda ng CARHRIHL, Protocol I ng 1977 at Kumbensyong Geneva ng 1949, at sa matagal nang patakaran ng BHB ng maluwag na pagtrato sa mga bihag.

Bilang bihag-ng-digma, isinailalim si Buan sa masusing imbestigasyon at matapos mapatunayang may sapat na katibayan ang mga demandang isinampa sa kanya, ipinailalim siya sa isang paglilitis.

Sa pagpapalaya, isususpindi ang isinagawang paglilitis kay Buan. Subalit mananatiling balido ang mga ebidensyang naipon sa proseso ng imbestigasyon at ang mga ito ay maaaring magamit muli laban sa kanya sakaling muli siyang mabihag ng BHB.

Hadlang sa pag-usad ng usapang pangkapayapaan

Ang pagpapalaya kay Buan ay bahagi ng ginagawang hakbangin ng PDPP upang maitaguyod ang maaliwalas na kalagayan para sa muling pagsulong ng usapang pangkapayapaan. Sa kabilang banda, patuloy namang nag-aatubili ang rehimeng US-Arroyo na nagdadalawang-mukha sa pagharap sa negosasyon.

Ayon sa pahayag ni Ka Bart, “Habang ang NDFP ay nagbibigay ng sinserong alok kay Arroyo na maisantabi ang mga balakid sa pagpapatuloy ng usapang pangkapayapaan sa GRP at sa gayon, bigyang-daan ang pagpapalaya sa dalawang POW na nasa pangangalaga ng Melito Glor Command, ang mataas na kumand ng AFP at PNP ay walang paglubay sa patakarang *all-out war* sa rebolusyunaryong kilusan hindi lamang sa rehiyong Timog Katagalugan kundi sa lahat ng rehiyong may usbong ng demokratikong kapangyarihang pampulitika ng rebolusyunaryong kilusan.”

Patuloy na ibinibimbin ng rehimeng US-Arroyo ang pagpapalaya sa mga bilanggong pulitikal na nauna nitong ipinangako. Walang sariling kapasyahan si Arroyo na gumawa ng inisyatiba hinggil sa pag-usad ng usapang

pangkapayapaan dahil pinipigilan ng militaristang pangkat na nakapaligid sa kanya. Sa pangunguna nina Gen. Ramos at Gen. de Villa, ang bloke ng militar na ito ay nakaposisyon ngayon sa mga estratehikong pwesto sa burukrasya at siyang nagpapasya sa galaw ng rehimeng US-Arroyo.

Ubos-kayang pinipigilan ng bloke ng militar na ito ang pag-usad ng usapang pangkapayapaan. hawak nito ang lahat ng inisyatiba tungkol sa usapin sa seguridad ng bansa na ang kahulugan ay ang pagtatanggol sa naghaharing sistemang malakolonyal at malapyudal.


Habang nagpapahiwatig ang rehimeng US-Arroyo ng kahandaan nitong pumasok sa usapang pangkapayapaan, wala naman itong ginagawa upang pigilin ang pananalasa ng militar sa karapatan at kabuhayan ng mamamayan sa utos ng militaristang pangkat.

Partikular sa Timog Katagalugan, patuloy ang mga operasyong militar ng mga *army special forces* sa ilalim ng 3rd Scout Ranger Battalion ng Task Force Banahaw sa Laguna, Rizal at Quezon. Ibayong pinsala ang inaabot ng mamamayan sa mga operasyong inilulunsad ng mga pwersa ng 74th, 31st, at 16th IB PA sa Bondoc Peninsula sa Quezon. Nagpapatuloy ang kontra-gerilyang operasyon ng mga pwersa ng Philippine Marines sa hangganan ng Batangas at Cavite. Ganoon din ang 3rd Battalion ng RSAF ng PNP sa dalawang lalawigan ng Mindoro.


Tinangkang sagipin ang nasawing si PCI Abelardo Martin kahit nakatakda na ang pagpapalaya sa kanya sa hangaring sagkaan ang maayos at ligtas na pagpapalaya ng BHB kay Martin. Ayaw ng pangkat na ito na malikha ang kalagayan na maghuhudyat ng pagsulong ng usapang pangkapayapaan.

Magpapatuloy ang usapang pangkapayapaan

Sa maagang yugto pa lamang ng pag-usad ng usapang pangkapayapaan, nagpapakita na kaagad ng kawalang sinseridad ang rehimeng US-Arroyo. Natural na katangian ito ng reaksyunaryong gobyerno na nagtataguyod sa paghahari ng imperyalismo, burukrata kapitalismo at pyudalismo sa bansa. Magkaganunman, mananatiling matatag ang rebolusyunaryong kilusan sa paninindigan nitong isulong ang usapang pangkapayapaan alinsunod sa linya ng demokratikong rebolusyon ng bayan. **K**



Isang Maningning na TAGUMPAY ng Kilusang-masa



Napatalsik na sa pwesto si Joseph Estrada. Winakasan ng magiting na pakikibaka ng mamamayan ang pinakamasahol na kaso ng pandarambong, imoralidad, lansakang paglabag sa karapatan at pagsasamantala na kinakatawan ng rehimeng US-Estrada. Kagaya ng pagpapabagsak kay Marcos, muling naulit sa Edsa ang pagsasama-sama at pagkilos ng mamamayan sa kanilang milyon upang pwerahing bumaba sa pwesto si Estrada.

Sa mga pakikibakang inilunsad mula nang pumutok ang iskandalo sa huweteng hanggang sa makasaysayang pagmamartsa ng taumbayan mula Edsa patungong Mendiola, ang pangunguna ng mga pambansa demokratikong pwersa ang naging mapagpasya at kumabig sa mga panggitnang pwersa at reaksyunaryong anti-Estrada upang buuin ang malapad na nagkakaisang prenteng anti-Estrada na nagpatalsik sa kanya.

Subalit ang Edsa, bagamat mapagpasya, ay isang bahagi lamang ng pambansang pag-aalsa ng mamamayan na naganap at lumaganap sa iba't ibang bahagi ng bansa. Sinuhayan ng mga kilusang masa sa iba't ibang bahagi ng bansa ang paglakas ng pakikibaka sa sentro ng kapangyarihan ng papet na rehimen. Sa kabilang banda, ang armadong pakikibaka at mga taktikal na opensiba ng hukbong bayan sa kanayunan ay indirektang sumuporta at nagpalakas sa daluyong ng mga pakikibakang masa na nahinog sa EDSA People Power 2. Lubos na pinahina nito ang rehimeng US-Estrada at

ibayong isinadlak sa sariling-likhang krisis sa ekonomya at pulitika.

Partikular na rehiyong TK, walang humpay na pinamunuan ng mga pambansa demokratikong pwersa sa rehiyon ang pagsasagawa ng malalaking pagkilos at panawagan upang buuin ang isang dambuhalang pwersa para sa pagpapabagsak kay Estrada. Bilang katabing rehiyon ng NCR, naging mahalagang tungkulin ng TK ang pagpapadala ng mga tao sa mga serye ng mobilisasyong-masa sa mga lansangan ng Kamaynilaan.

Gumanap ng napakahalagang tungkulin ang itinayong panrehiyong alyansa ng mga organisasyong naglalayong patalsikin si Estrada upang ikonsolida ang nabuong lakas at pamunuan ang malalaking pagkilos sa TK.

Ipinakita ng mamamayan ng rehiyon ang kanilang matibay na determinasyon at kahandaang isulong ang kanilang pakikibaka laban sa rehimeng US-Estrada sa

Sundan sa kasunod na pahina ►



Si Ka Bart Tungkol sa PTC at Eleksyon

Pinakawalan ng mersenaryong Sandatahang Lakas ng Pilipinas (AFP) ang sistematikong pagpapakalat ng nakalalasong intriga hinggil sa pag-i-isyu ng rebolusyunaryong kilusan ng mga permit-to-campaign (PTC) sa mga nagnanais kumandidato sa reaksyunaryong eleksyon.

Ipinagkakalat ng AFP sa burgis na midya na sinasamantala ng rebolusyunaryong kilusan ang eleksyon upang “makapangotong” sa mga pulitikong kandidato. Ito ay sa pamamagitan diumano ng “pagpapatubos” ng PTC upang malaya silang makapangampanya sa mga lugar na saklaw ng mga sona’t larangang gerilya ng rebolusyunaryong kilusan.

Kaugnay nito, minabuti ng Kalatas na kapanayamin si Tirso “Ka Bart” Alcantara, tagapagsalita ng Melito Glor Command (MGC), upang magbigay-linaw sa usaping ito. Narito ang mga bahagi ng nasabing panayam.

KALATAS (K): Ano ba itong PTC na ini-isyu sa mga kandidatong pulitiko?

Ka Bart (KB): Ang PTC ay ang permiso na ibinibigay ng rebolusyunaryong kilusan sa mga reaksyunaryong pulitikong tumatakbo sa burgis na eleksyon para makapasok sa saklaw ng mga sona at larangang gerilya

nito. Ito ay katibayan na pinahihintulutan ng demokratikong gubyernong bayan ang mga pulitikong kandidatong mayhawak nito na mangampanya sa mga lugar na nasa saklaw na ng mga sona’t larangang gerilya ng rebolusyunaryong kilusan. Dito sa ating rehiyon,

Sundan sa kasunod na pahina ►

◄*Mula sa nakaraang pahina*

mga mobilisasyong-masang inilunsad tulad ng WeBa noong Nobyembre 14 at ng Martsa ng Mahihirap para Patalsikin si Erap noong Nobyembre 25-30. Nagsama-sama at nagkapit-bisig ang mga manggagawa, magsasaka, kabataan, taong simbahan at mga kawani upang ipahayag ang masidhing pagkasuklam sa bulok at pasistang rehimen at ang mithiin nilang palayasin sa Malakanyang si Estrada.

Aktibong isinulong ang iba’t ibang tipo ng pagkilos tulad ng pagbubuo ng mga pamprobinsyang alyansa, pagtatayo ng mga bagong organisasyon, pulong-talakayan, kulturang pagtatanghal, propaganda-ahitasyon at mga kilos-protesta. Nagawa ring maitayo ang mga *protest camps* na nagsilbing lunsaran ng mga aktibidad tulad ng pagpapalabas ng mga makabuluhang pelikula, *signature campaign*, pag-aaral at iba pa. Sa mga eskwelahan, naging tampok na tanawin ang mga itinatayong *protest booths* ng mga aktibistang estudyante.

Bago magtapos ang 2000, nasaksihan sa rehiyon


ang iba’t ibang porma ng pagkilos na inilunsad sa pamumuno ng panrehiyong alyansa. Sa mga pagkilos na ito, nahasa ang pagkamalikhain ng aktibistang masa sa pagpapahayag at pagsasagawa ng iba’t ibang tipo ng pakikibaka.


Wastong napanghawakan ang kasarinlan at inisyatiba ng pambansa-demokratikong kilusan sa loob ng nagkakaisang prenteng anti-Estrada sa patnubay ng Partido, nagpunyagi itong makabig ang iba’t ibang pwersa sa lipunan at mapamunuan ang mga pakikibakang inilunsad para patalsikin si Estrada.

Nang pumutok ang pag-aalsang Edsa, kaagad na tumugon ang TK sa panawagang tumungo sa Edsa at lumahok sa protesta.

Ang mga naiwan ay naglunsad pa rin ng mga pagkilos sa kani-kanilang probinsya bilang pagpapakita ng suporta sa pag-aalsa sa Edsa.

Sa pagbagsak ni Estrada, kasama ang TK ng buong bansa sa pagdiriwang ng maningning na tagumpay ng pag-aalsang masa upang patalsikin ang isang kinamumuhang rehimen. **K**





◀Mula sa nakaraang pabina

sinasaklaw na nito ang mga kandidatong tumatakbo mula sa pagka-gubernador, konggresman, meyor, at panlalawigan hanggang sa pambayang konsehal sa mga teritoryong saklaw na ng kapangyarihan ng Melito Glor Command. At 'yan ay ang halos kabuuan na ng ating rehiyon.

Naglalabas ng PTC ang rebolusyunaryong kilusan bilang pagpapakita ng pag-iral ng Pulang kapangyarihan sa mga eryang saklaw ng NPA. Ang pagkuha ng mga reaksiyunaryong pulitiko ng PTC ay singkahulugan ng pagkilala nila sa umiiral na demokratikong gobyernong bayan sa kanayunan.

K: Bakit naglalabas ng PTC ang rebolusyunaryong kilusan?

KB: Bagamat ang rebolusyunaryong kilusan ay hindi naniniwala na ang burgis na eleksyon ang maghahatid ng tunay na kalayaan at demokrasya ng bayan, kinikilala rin naming laganap pa ang paniniwala ng masa sa eleksyon. Dahil dito, naglalabas ng PTC ang rebolusyunaryong kilusan upang matiyak na mabawasan nang malaki ang karahasan at dumi ng pangangampanya ng mga reaksiyunaryong pulitiko sa mga sona't larangang gerilya.

Una na, hindi na binibigyang permiso ang mga kilalang talamak na

despotiko at kontra-rebolusyunaryong pulitiko na mangampanya sa mga Pulang purok. Hindi na sila hahayaan pang maghasik ng kanilang kabulukan sa mga sona't larangang gerilya. Sa mga nabibigyan ng pahintulot, kailangang sumunod sila sa mga patakarang itinatakda ng rebolusyunaryong kilusan.

K: Ano ang mga ito?

KB: Mahigpit na ipinagbabawal ang pagdadala ng anumang tipo ng sandata sa mga eryang saklaw ng NPA sa panahon ng kampanya. Ang paglabag dito ay

maaaring humantong sa kumpiskasyon ng mga armas at sa kanselasyon ng PTC. Isa pa, bawal ding maniktik ang mga kandidato o kinatawan ng mga ito sa masa sa panahon ng kampanya. Hindi rin ipinahihintulot na gumamit ng karahasan, pananakot sa masa at pagpapalaganap ng mga kontra-rebolusyunaryong propaganda at intriga sa panahon ng kampanya. Ang paglabag dito ay papatawan ng NPA ng nararapat na parusa.

K: Ibinabando ng pasistang militar sa burgis na midya na ginagamit lang daw ng mga NPA ang PTC upang makotongan ang mga pulitiko. Na naniningil ang rebolusyunaryong kilusan ng malaking halaga kapalit ng PTC. Ano'ng masasabi niyo rito?

Sundan sa kasunod na pabina ►

"Ang tanging karapatang makakamtan ng bayan sa ganitong eleksyon ay ang kalayaang mamili kung sino ang susunod na magsasamantala sa kanila."

"Karapatan at tungkulin ng demokratikong gobyernong bayan na maningil ng buwis,... (na ginagamit) sa papaigting na pagsusulong ng digmang bayan at serbisyong panlipunan."

◀ *Mula sa nakaraang pahina*

KB: 'Yan ay walang dili't iba kundi maitim na intrigang isinasaboy ng AFP, sa basbas ng rehimeng US-Arroyo, sa Partido Komunista ng Pilipinas, Bagong Hukbong Bayan at sa Pambansa Demokratikong Prente ng Pilipinas sa imbing pakana nilang dungisan ang malinis at maringal na reputasyon ng buong rebolusyunaryong kilusan sa sambayanang Pilipino. Pinaghahalo nila ang tama at mali upang makapaglubid ng mga kasinungalingan laban sa rebolusyunaryong kilusan. Sa kasong ito, maling-mali na sabihing pangongotong o pangingikil ang sinisingil ng rebolusyunaryong kilusan sa mga kandidatong pulitiko kapalit ng PTC.

Bakit? Dahil ang binabayaran nila ay rebolusyunaryong buwis sa demokratikong gobyernong bayan upang magkaroon sila ng karapatang makapangampanya sa mga sona't larangang gerilya sa panahon ng eleksyon, alinsunod sa itinakdang mga patakaran. Karapatan at tungkulin ng demokratikong gobyernong bayan na maningil ng buwis, at ang pagbabayad ng mga kandidatong pulitiko ng rebolusyunaryong buwis ay nangangahulugang kinikilala nila ang kapangyarihan ng ating demokratikong gobyernong bayan.

At ang mga buwis na ito, kabaligtaran ng ginagawang pangungurakot ng reaksyunaryong pamahalaan sa mga nasisingil nilang buwis, ay ginagamit ng rebolusyunaryong kilusan sa papaigting na pagsusulong ng digmang bayan at serbisyong panlipunan. **K:** Nabanggit ninyo kanina na hindi naniniwala ang

rebolusyunaryong kilusan sa burgis na eleksyon bilang landas ng pagbabago. Pwedeng pakipaliwanag pa ito? **KB:** Ang eleksyon ay isang enggrandeng instrumento ng panloloko ng mga naghaharing uri sa ating mamamayan. Ang tanging dahilan ng burgis na eleksyon ay linlangin ang sambayanan sa kunwaring pagkakaroon ng demokrasya at ang ilusyon ng pagkakataon ng pagbabago. Bakit natin nasabi 'yan? Sapagkat ang magastos na katangian ng burgis na eleksyon ang nagtitiyak na ang mga kabilang lamang sa mga naghaharing uri ang maaaring kumandidato at may katiyakang mananalò. Kaya nga't ang reaksyunaryong eleksyon ay moro-moro lamang sa pagitan ng mga paksyon sa loob ng naghaharing uri na nag-aagawan sa kapangyarihan at kabang yaman ng ating bansa.

Ang tanging karapatang makakamtan ng bayan sa ganitong eleksyon ay ang kalayaang mamili kung sino ang susunod na magsasamantala sa kanila. Ang napapalitan lamang tuwing eleksyon ay ang maskara ng mabagsik na halimaw na nandarambong at nandarahas sa sambayanang Pilipino.

Naninindigan ang rebolusyunaryong kilusan na makakamit lamang ng sambayanan ang ganap na kalayaan, demokrasya at kasaganaan sa pamamagitan ng pagtatagumpay ng dalawang-yugtong rebolusyong Pilipino.

Magkagayunman ang burgis na eleksyon, at alinsunod na rin sa patakaran ng rebolusyunaryong dalawahang taktika, ginagamit din ng rebolusyunaryong kilusan ang eleksyon upang maisulong ang hinaing at adhikain ng mamamayan kahit sa napakalimitadong paraan. Ito ay sa pamamagitan ng pagsuporta sa ilang progresibong kandidato sa iba't ibang antas at sa lumitaw na progresibong partido para sa eleksyon ng *party list* laban sa mga despotiko't reaksyunaryo nilang katunggali.

Dahil na rin sa reaksyunaryong katangian ng kasalukuyang estado, tiyak nang hindi makapagpapatupad ng mga makabuluhang programa't batas para sa taumbayan ang maihahalalal na minoryang mga progresibo. Pero magagawa nilang ilantad sa mas maraming bilang ng mamamayan sa mas maraming pagkakataon ang mga kabulukan sa pamahalaan, ang mga hinaing at mithiin ng sambayanan, at higit sa lahat, maipaliwanag ang ugat ng mga problemang nagpapahirap sa bayan at ang rebolusyunaryong landas ng pagbabago. **K**

ALAB, Muling Binuhay

Narito na muli ang Alab!

Ang Alab ang opisyal na pahayagan ng rebolusyunaryong kilusan sa isla ng Mindoro. Inilabas ng muling-tatag na Alab ang unang isyu nito (Enero-Pebrero 2001) nitong Marso.

Nauna ang rebolusyunaryong kilusan ng isla ng Mindoro sa mga teritoryal na komite ng Partido Komunista ng Pilipinas sa rehiyong Timog Katagalugan sa paglalabas ng panlalawigang pahayagan.

Ang Alab ay lalabas tuwing ikalawang buwan. Nilalaman nito ang mga paninindigan at pananaw ng Partido't Hukbo, at mga suliranin at pakikibaka ng rebolusyunaryong mamamayan sa Mindoro. Lalamnin din nito ang mga pagsusuri't panawagan ng rebolusyunaryong kilusan sa mga batas, patakaran, programa't proyekto ng pamahalaan at pribadong mamumuhunan na nakapipinsala sa mamamayan, ang mga tagumpay sa hakbang-hakbang na pagpapatupad ng 1--puntong programa ng pambansa demokratikong rebolusyon, at ang mga karanasan ng rebolusyunaryong kilusan sa lahatang-panig na pagsusulong ng demokratikong rebolusyong bayan sa isla ng Mindoro.

Ang Alab ay muling binuhay makalipas ang ilang taong pagkakahimbing. Ang naturang pahayagan ay kabilang sa mga naging biktima ng mga paglihis at pagkakamali sa nakaraan. Kaya katulad ng iba pang panlalawigang rebolusyunaryong pahayagan, nawala rin ito sa sirkulasyon. Ang muling paglalabas ng Alab ay pagpapakita ng muling paglakas ng rebolusyunaryong kilusan bunga ng Ikalawang Dakilang Kilusang Pagwawasto (IDKP).

Para sa unang isyu, pangunahing sinuri ng Alab ang kahulugan ng pagbabago ng naghaharing rehimen sa lipunang Pilipino, at ang people power 2 na nagluklok sa bagong rehimen sa kapangyarihan.

Bukod sa mga lathalain, ang Alab ay may hatid na mga "balita mula sa larangan ng digma", at katatawanan (dyoks at komiks). **K**

Sa halos dalawang taon ng pagkabiha

Itinataguyod ng BHB ang Karapatan ni Buan Bilang Bihag-ng-Digma

Sinisikap ng BHB Melito Glor Command na gawin ang buong makakaya upang ligtas at maayos ang gagawing pagpapalaya kay Army Major Noel Buan. Titiyakin nito na hindi mauulit kay Buan ang trahedyang nangyari kay PCI Abelardo Martin na ibinunga ng pataksil na atake at bigong pagliligtas kay Martin ng AFP kahit nakatakda na siyang palayain.

Sa halos dalawang taon ng pagkakahibag ng BHB kay Buan, itinataguyod ng BHB ang kanyang karapatan bilang bihag-ng-digma nito. Itrinato siya alinsunod sa malaon nang patakaran ng rebolusyunaryong kilusan ng makataong pagtrato sa mga bihag-ng-digma, sa mga probisyong nakasaad sa Kombensyong Geneva ng 1949 at Protocol I at sa Kumprehensibong Kasunduan sa Paggalang sa Karapatang Pantao at Pandaigdigang Makataong Batas (CARHRIHL).

Bilang bihag-ng-digma, isinailalim si Buan sa masusing imbestigasyon at paglilitis matapos mapatunayang may sapat na ebidensya upang litisin siya sa proseso ng imbestigasyon. Tiniyak na walang nangyaring anumang pamimilit o pananakit upang paaminin siya sa kanyang mga krimen sa bayan.

Mahigpit na sinusunod ng kanyang mga kustodyan ang tagubilin na panatilihin lagi siyang nasa mabuting kalagayan at tinatamasa ang lahat ng karapatan niya bilang bihag-ng-digma. Pinangalagaan ang kanyang kalusugan


at hindi ipinagkait sa kanyang pamilya ang mga impormasyon tungkol sa

k a n y a n g
kalagayan at
a n g
karapatang
magkaroon ng

komunikasyon sa kanila
sa pamamagitan ng
sulat.

Sundan sa kasunod na

pahina
KALATAS / 13



Bayan ng Burdeos, Muling Ni-REYD

Muli, walang nagawa ang mga pulis.

Matagumpay na ni-reyd ng mga pwersa ng Melito Glor Command ang pambayang himpilan ng pulisya sa Burdeos, Quezon noong Marso 2. Walang nagawa ang mga nasorpresang pulis sa Pulang Hukbo na nagpanggap na mga sundalo dakong alas-9:45 ng umaga.

Matapos maglakad ng isa't kalahating minuto mula sa tinigilan, mabilis na pumasok sa istasyon at tinutukan ng umatakeng yunit ang nag-iisang pulis. Kagyat nilang nakontrol ang himpilan at ang buong munisipyo. Kasabay nito, agad ding pinuntahan ng mga nakatalagang tim ang mga bahay ng mga pulis, nahuli ang isa pa, at kinumpiska ang kanilang mga baril.

Hinuli rin ang isang kilalang pusakal na *drug pusher*.

Kabilang sa mga nakumpiska sa nasabing reyd ang apat na M-16 riple kasama ang 43 magasin at mahigit 2,000 bala, isang 9 mm pistola kasama ang tatlong magasin at 46 bala, dalawang kalibre .38 rebolber kasama ang 9 na bala, anim na magasin ng M-14 na may 70 bala, dalawang bala ng M203, apat na *rifle grenade*, tatlong *radio base* at apat na *Icom radio*.

Matapos makontrol ang mga target, nakapagsagawa pa ng pulong masa ang mga pwersang

gerilya sa sentrong-bayan sa loob ng dalawang oras.



Tinalakay sa nasabing pulong masa ang tungkol sa Bagong Hukbong Bayan, ang tatlong ugat ng kahirapan, ang demokratikong rebolusyong bayan bilang tanging landas sa paglaya ng sambayanan, at ang paglaban ng rebolusyunaryong kilusan sa droga. Kaugnay sa droga, iniharap sa taumbayan ang nahuling drug pusher at binalaan ito sa harap ng madla, gayundin ang iba pang katulad niya.

Dahil sa paninindigang ito laban sa droga, umani ang rebolusyunaryong kilusan ng simpatya sa mga taong-simbahan, na narinig sa lokal na radyong DZJO.

Ipinakita rin ng MGC ang wastong pagtrato sa mga bihag-ng-digma nang inalpasan ang nakataling mga pulis bago sila umalis sa lugar.

Nauna rito, inatake na rin ng yunit ng MGC ang detatsment ng Philippine Coast Guard sa nasabi ring bayan noong Setyembre 24, 2000. Na-reyd nang walang putok ang naturang detatsment. Nakumpiska rito ang tatlong M-16 riple kasama ang 15 magasin at 540 bala, isang kalibre .38 rebolber at apat na bala, isang kalibre .22 pistola at 16 na bala, at iba pang kagamitang militar. **K**

◀Mula sa nakaraang pabina

Kabaligtaran ito sa ginagawang pagtrato ng mga militar sa mga nabibihag nilang kasapi ng rebolusyunaryong kilusan. Wala sa bokabularyo nila ang salitang karapatan ng kanilang mga bihag. Sa halip na ipakita ang wastong pagtrato sa kanilang mga bihag, pagpaslang, tortyur at pananakot ang nararanasan ng mga bihag.

Tampok na karanasan ang nangyari kay Ka Sixto Serna na matapos masugatan sa isang labanan at mahuli nila ay walang awang pinaslang.

Walang maaasahang ipakikitang paggalang sa karapatan sa mga bihag-ng-digma mula sa mga militar. Natural na katangian ito ng mga pasista at mersenaryong militar. Bahagi ng kanilang oryentasyon ang pagiging mabagsik at walang awa sa kanilang nabibihag upang maihasik ang takot at pandarahas sa mamamayan. Sa ganitong paraan, inaakala nilang masasagkaan ang patuloy na paglaban ng rebolusyunaryong kilusan at mamamayan.

Sa huling pagsusuri, ang kanilang karahasan at kawalang paggalang sa karapatan ng mamamayan ay nagsisilbing gatong upang sumidhi ang naglalagablab na pakikibaka ng taumbayan. **K**

2 Kaaway, Napatay sa Batangas

Dalawang pasistang tropa ang napatay ng isang yunit ng BHB sa isang depensibang labanan na naitransporma bilang opensiba. Naganap ang nasabing labanan sa Bgy. Mataas na Pulo, Nasugbu, Batangas noong Enero 2.

Napatay sa nasabing labanan si Marine Pfc. Marlon Tesiorna at isa pang di nakilalang kawal. Sila ay kabilang sa Recon Force, Batch 6, Team 135 ng Philippine Marines, at nakabase sa Fort Magsaysay, Nueva Ecija. Si Tesiorna ay isang tagapagsanay ng Philippine Marines.

Nasamsam sa proseso ng labanan ang isang ripleng M14 na may 40 bala, at mga dokumento sa pagsasanay ng Philippine Marines. Kabilang sa nilalaman ng nasabing mga dokumento ang bagong mga taktika at teknika ng pasistang kaaway sa pagsalakay sa mga yunit ng BHB.

Batay sa nakalap na mga impormasyon, napagalamang nauna nang nakarating sa pulisya ang ulat na may nakahimpil na yunit ng BHB sa nasabing baranggay. Ipinasa umano ng pulisya ang impormasyong ito sa Philippine Marines. Nagkataon namang may nagsasanay na tatlong tim ng Philippine Marines sa kabundukan ng Maragondon, Cavite. Ang mga tim na ito umano ang inatasan ng pambansang himpilan ng Philippine Marines na siyasatin ang katotohanan ng nasabing impormasyon.

Isa sa mga tim na ito, ang Team 135, ang nakasugaga sa hinihimpilan ng yunit ng BHB. Subalit nauna silang nakita ng mga Pulang mandirigma na nagbabantay kayat kagyat silang naputukan. Halos magkasunod na tinamaan ang dalawang nasawi.

Nasamsam muna ng yunit ng BHB ang riple at mga gamit ni Tesiorna bagong tuluyang umatras matapos ang humigit-kumulang 45 minutong palitan ng putok.

Samantala, walang awa namang pinaslang ng mga sumuportang tropa ng Philippine Marines ang dalawang di-nakilalang sibilyan na nakatira sa di kalayuan ng pinangyarihan ng labanan. Dalawa pa sa kanila ang nasugatan.

Pinangunahan ng *commanding officer* ng Recon Force, isang Capt. Ruedas, ang nasabing pamamaslang


4 Kaaway, Napatay sa Labanan

Apat na kaaway ang napatay sa isang depensibang labanan.

Tinangkang kubkubin ng pinaghalong elemento ng 1st IB PA at 3rd SRC ang isang sandatahang yunit pampropaganda sa Bgy. Kabuuan, Sta. Maria, Laguna noong Pebrero 16. Subalit nauna silang nakita ng mga Pulang mandirigmang nakataliba. Kagyat na nakapagpapatok ang mga taliba habang pumapakat pa lamang ang kaaway.

Tumagal ang labanan mula alas-6 hanggang alas-6:30 ng umaga.

Batay sa mga ulat ng masa't mga aktibista sa lokalidad, apat ang nakumpirmang napatay sa hanay ng kaaway. Gayunman, walang nasamsam ang Pulang Hukbo sa kanilang mga kagamitang militar. **K**



Sariling SOMO, Nilabag ng Kaaway

Dalawang beses na dinahas ng militar ang mga magsasaka ng Macalelon, Quezon noong buwan ng Marso sa kabila ng umiiral na *suspension of offensive military operations* (SOMO) sa Timog Katagalugan.

Dahil dito, hindi maitatangging mulat na nilabag ng mga sundalo ang SOMO na utos ng kanilang *commander-in-chief*, bukod pa sa paglabag sa mga karapatang pantao ng mga sibilyang biktima.

Unang hinaras ang mahigit 11 lider-magsasaka ng Kongreso ng Magbubukid para sa Repormang Agraryo (Kompra) noong Marso 17-18. Pinangunahan ni Army Lt. Salvador "Lagalag" Ubado ng 76th IB PA ang paglusob sa himpilan



ng Kompra sa Bgy. Vista Hermosa. Binugbog ng mga

Sundan sa kasunod na pabina ►

◀Mula sa nakaraang pahina

militar ang nasabing mga opisyal sa hindi pa malamang dahilan.

Kasama sa mga dinahas ng mga militar sina Liberato Indrinal, Rita at Juan Palmero, Charlie Andor, Sofronio at Melchor Perez, Castro Marikit, Alexander Castro, Romy Rivera at Liberato Mediabello.

Iligal na hinuli naman ang apat na magsasaka noong Marso 23, muli sa pangunguna ni Lt. Ubado. Kabilang sa mga hinuli ang kapitan ng baranggay at si Evangeline Bayani.

Ang SOMO ay ipinatupad ng gubyernong Arroyo mula Marso 11 hanggang Abril 11 sa 11 lalawigan ng Timog Katagalugan upang bigyang-daan ang pagpapalaya ng Melito Glor Commmand sa bihag-ng-digmang si Army Major Noel Buan. Sa pamamagitan nito, dapat ay nasa baraks ang lahat ng mga sundalo at walang isasagawang anumang anyo ng operasyong militar.

Si Major Buan ang *intelligence chief* ng dating Southern Luzon Command (SOLCOM) ng AFP na sumasaklaw sa mga rehiyon ng Timog Katagalugan at Bikol. Nabihag siya ng MGC noong Hulyo 1999. **K**

Tumututol sa RBKU, Pinarusahan


Pinarusahan ng isang yunit ng Lucio de Guzman Command (LdGC) ang Alarcon Construction dahil sa

hindi pagsunod sa patakaran sa rebolusyunaryong pagbubuwis. Sinunog ang ilang kagamitan nito sa konstruksyon sa Bgy. Nicolas, Magsaysay, Occidental Mindoro dakong alas-2 ng hapon noong Enero 28.

Isang *bulldozer*, isang *air drill* at isang *bunkhouse* ang sinunog ng nasabing yunit. Ayon sa pahayag sa midya ng may-ari, si Feliciano Alarcon, umaabot sa P 10 milyon ang halaga ng mga nasunog.

Sa isang kaugnay na balita, pinasabog ng isang yunit ng MGC ang isang tore sa komunikasyon ng Smart Communications sa Lobo, Batangas noong Marso. Pinarusahan din ito ng rebolusyunaryong kilusan dahil sa pagtangga nitong sumunod sa mga patakaran sa pagbubuwis ng rebolusyunaryong pamahalaan.

Ang rebolusyunaryong pagbubuwis ay ipinatutupad sa mga sona at larangang gerilya bilang bahagi ng pagpapairal ng kapangyarihan ng Pulang gubyerno ng mamamayan sa kanayunan. Ang mga nakukuhang buwis ay ginagamit naman ng rebolusyunaryong kilusan sa pagbibigay ng mga panlipunang serbisyo sa rebolusyunaryong mamamayan at mga gawain sa pagsusulong ng demokratikong rebolusyon ng bayan. **K**



teka-teka

